

आकाशवाणी

खबरां विजय बजाज कोला,

पैहले खास-खास खबरां:-

1. केन्द्री मंत्रिमंडल ने 20 ज्हार 800 करोड़ रुपें शा मते दी रास-पूंजी आहली 8 रेलवे मल्टी-ट्रैकिंग परियोजनाएं गी मंजूरी देई दिती ऐ।
2. प्रधानमंत्री नरेन्द्र मोदी होरें आखेआ ऐ जे मंत्रिमंडल दे फैसले कन्नै रेल जातरिएं दी आओ-जाई तेज होग, संपर्क सरिस्ता बेहतर बनग ते माल ढुलाई आहली समर्थ च बी बाददा होग।
3. उद्योग ते बपार मंत्री पीयूष गोयल होरें ब्रिक्स मुल्खें गी महिला उद्यमियें ते महिलाएं दे नेतृत्व आहले कारोबार गी अंतर्राष्ट्री बपार च अगगे बधाने लेई मिलियें कम्म करने दा आहवान कीता ऐ।
4. नेपाल च आए दे बनाशकारी हाड़ दे मददेनजर भारत ने मनुक्खी सहायता तेज करदे होई 130 टन शा मती राहत समग्री भेजी ऐ। भारत ने खोज, बचाऽ ते फोरेंसिक अभियानें च सैहयोग लेई 54 माहिरें-विशेषज्ञें गी बी तैनात कीता ऐ।
5. मौसम विभाग ने अज्ज ओडिशा च मौलेधार बरखा बरने दी रेड-अलर्ट आहली चेतावनी जारी कीती ऐ।
6. अमरीकी ओपन च मर्दे दे सिंगल्स दे सेमीफाईनल च अमरीकी खड्गारिएं बेन शेल्टन दा मुकाबला हमवतन फ्रांसिस टियाफो दे कन्नै होग।

ते हून खबरा विस्तार कन्नै:-

<><><><><><>

Cabinet Railway

केन्द्री मंत्रिमंडल ने 20 जहार 800 करोड़ रुपें शा मते दी रास-पूंजी आहली 8 रेलवे मल्टी-ट्रैकिंग परियोजनाएं गी मंजूरी देई दिती ऐ। इ'ने परियोजनाएं दा मकसद प्रमुख मार्ग पर लाइन सरबन्धी समर्थ बधाना, परिचालन दक्षता च सुधार करना ते भीड़-भाड़ घट्ट करना ऐ। मंत्रिमंडल दी बैठक दे बाद कल सूचना ते प्रसारण मंत्री अश्विनी वैष्णव होरें दस्सेआ जे 10 जहार 783 करोड़ रुपें शा मते दी लागत आहली त्रै परियोजनां पच्छिम बंगाल, झारखंड, ओडिशा, मध्य प्रदेश ते छत्तीसगढ़ दे 14एं जिलें गी कवर करडन। एहदे कन्नै गै मजूदा रेलवे नेटवर्क च तकरीबन 656 किलोमीटर दा विस्तार बी होग। इ'दे च खड़गपुर-झारसुगुड़ा चैथी लाइन, कटनी-पेंड्रा रोड चैथी लाइन ते बिलासपुर-पेंड्रा रोड आहली त्रीऽ लाइन शामिल ऐ। इ'नेगी 2029-30 तगर पूरा कीता जाहग। तकरीबन इक जहार 21 करोड़ रुपें दी लागत आहली होरनें 5 परियोजनां, तमिलनाडु, आंध्र प्रदेश, कर्नाटक ते तेलंगाना दे 17 जिलें गी कवर करडन। एहदे'नै नेटवर्क च तकरीबन 540 किलोमीटर दा बाददा-विस्तार होग। इ'दे च अरक्कोनम-रेनिगुंटा त्रीऽ ते चैथी लाइन सने व्हाइट फील्ड-बंगारापेट आहली त्रीऽ ते चैथी लाइन ते होसुर-ओमालूर लाइन दा दोहरीकरण बी शामिल ऐ। एकड़ी परियोजनाएं कन्नै तकरीबन 52 लक्ख दी आबादी आहले लगभग 2 जहार 100 गांएं दी कनेक्टिविटी च सुधार होग।

<><><><><><>

PM- Railway

प्रधानमंत्री नरेन्द्र मोदी होरें आखेआ ऐ जे रेलवे दी मल्टी-ट्रैकिंग परियोजनाएं पर मंत्रिमंडल दे फैसले कन्नै जातरिएं दी आओजाई तेज होग, संपर्क सरिस्ता बेहतर बनग ते माल ढुलाई आहली समर्थ च बी बाददा होग। उ'नें आखेआ जे इ'नें परियोजनाएं कन्नै दक्खनी भारत च रेल संपर्क मजबूत होग ते लक्खां बद्धे लोकें गी लाह हासल होग। प्रधानमंत्री होरें इब्बी आखेआ जे मल्टी-ट्रैकिंग परियोजनाएं कन्नै छत्तीसगढ़, झारखंड, मध्य प्रदेश, ओडिशा ते पच्छिम बंगाल च रेलवे नेटवर्क दा विस्तार होग ते संपर्क सरिस्ते च बी सुधार औग। श्री मोदी होरें आखेआ जे इ'नें परियोजनाएं कन्नै विरासत ते वन्यजीवें सरबन्धी सैलसफा गी खास बढ़ावा मिलग ते कन्नै साज-समयान सरबन्धी लागत घट्ट करने च मदाद मिलग।



Goyal BRICS

केन्द्री उद्योग ते बपार मंत्री पीयूष गोयल होरें ब्रिक्स मुखें अगगे अंतराष्ट्रीय बपार च महिला उद्यमियें ते महिला नेतृत्व आहले उद्यमें लेई कम्म ते मौकें दा विस्तार-बाददा करने दा आहवान कीता ऐ। नमीं दिल्ली च लोआए गेदे “ब्रिक्स महिला बपार गठबंधन” BRICS-W.B.A, महिला नेतृत्व आहले विकास सम्मेलन -2026 च बतौर मुख परौहने, अपने सम्बोधनै च उ'नें एह गल्ल आक्खी। पीयूष गोयल होरें आखेआ कि भारत नै महिला उद्यमिएं ते महिलाएं दी अगुआई आहले उद्यमें गी बढ़ावा देने लेई महिलाएं दे माली सशक्तिकरण, उन्दी समाजी मजबूती, शिक्षा, हुनर विकास ते उन्दे जीवन स्तरै गी उबड़ा चुक्कने बक्खी चेचा ध्यान दिता ऐ। उ'नें आखेआ कि

अंतराष्ट्रीय स्तर पर महिलां उद्यमिणं दे सशक्तिकरण ते विकास लेई उन्दे लेई सखल्ले दोआर-कर्जे, बजारें ते खरीददारें तगर पुज्ज ते साफ स्पष्ट नियम-कायदे तयार करने बक्खी ब्रिक्स गी चेचा ध्यान देना चाहिदा।



Nepal -Flood

नेपाल च आए दे बनावकारी हाइ दे मद्देनजर भारत ने मनुक्खी सहायता तेज करदे होई 130 टन शा मती राहत समग्री भेजी ऐ। भारत ने खोज, बचास ते फोरेंसिक अभियानें च सैहयोग लेई 54 माहिरे-विशेषज्ञें गी बी तैनात कीता ऐ। नेपाल च स्थित भारत दे राजदूती दफ्तरें कल दस्सेआ जे 35 टन राहत ते बचास समग्री लेइयै भारती वायु सेना दा 8मां जहाज काठमांडू पुज्जा। 26 अगस्त थमां शुरू कीते गेदे इस सहायता अभियान च भारत ने बशेश तकनीकी उपकरण बी भेजे न। इंदे च चिक्कड़ कोला बचास आहले सूट, गैस डिटेक्टर, साह लैने च मदाद सरबन्धी यंत्र, इन्फ्लेटेबल वॉकवे, पोर्टेबल जनरेटर, प्रकाश टावर ते जल निकासी पंप शामिल न। पीड़ितें दी पन्छान च मदाद गितै भारत ने डी.एन.ए किट ते डीएनए प्रोफाइलिंग उपकरण बी उपलब्ध कराए न। एहदे शा पैहले, बदेश मंत्रालय ने दस्सेआ जे भारती राजदूत नवीन श्रीवास्तव होरें नेपाल दे मंत्री महावीर पुन गी राहत समग्री सौंपी। तोआई भारत दे बशेश सुरंग बचास दल ने नेपाल दी सेना दे कन्नै मिलियै चिलिमे ते लांगटांग च द'उं उच्च जोखिम आहली थाहें पर सांझा अभियान शुरू कीता। चिलिमे सुरंग दे ऊबड़-खाबड़ हिस्सें, सीमित पुज्ज ते सुरंग दी खड़ी ढलानें करी बचास कर्मियें गी गंभीर चुनौतियें दा सामना करना पवा करदा ऐ। बचास दल खुदाई मशीनें ते होरनें भारी मशीनें गी सिद्धे

सुरंग तगर लेई जाने आस्तै आरजी रस्ते दा निर्माण करा'रदा ऐ। निर्माण कम्म तेजी कन्नै अगगे बधा करदा ऐ ते 2 शा 3 दिनें दे अंदर पूरा होने दी मेद ऐ।

<><><><><><>

IAEA

अंतराष्ट्रीय परमाणु ऊर्जा एजेंसी IAEA दे गर्वनरें दे बोर्ड नै पिच्छले 20एं बरे च पैहली बारी इरान दे परमाणु कार्यक्रम दे मामले गी संयुक्त राष्ट्र सुरक्षा परिषद गी सोंपने दा प्रस्ताव पास कीता ऐ। एह प्रस्ताव अमरीका, ब्रिटेन, फ्रांस ते जर्मनी आसेआ सांझे तौरा पर पेश कीता गेआ। बंद कमरे च होई दी इस बैठक च प्रस्ताव दे पक्खे च 23 वोट पे, जिसलै कि 3 देशें एहदा विरोध कीता। विरोध करने आहलें मुख्यें च रुस, चीन ते नाइजर शामिल हे, जिसले कि 8 मुख्य इस प्रस्ताव बैठक च शामिल नैई होए। IAEA दे बोर्ड च कुल 35 मिम्बर मुख्य शामिल न।

<><><><><><>

FATF-Global Alert

दुनिया भरै च रपे-पैहे सरबन्धि अपराधें पर तक्क रखने आहली संस्था FATF ने दुनिया भरै दे मुख्यें गी ऑनलाइन गेमिंग ते सट्टे-बाजी जनेह प्लेटफार्मे दे गलत इस्तमाल गी लेइयै इक गंभीर चेतावनी जारी कीती ऐ। पेरिस स्थित इस संस्था ने अपनी ताजा रिपोर्ट च दस्सेआ ऐ कि कैई डिजिटल मंच हून काले-धनै गी जायज बनाने ते आतंकवाद लेई रपेया-पैहा मुहेइया कराने दे रुपै च कम्म करा'करदे न। FATF ने 80 कोला मते मुख्यएं ते माहिरें कन्नै मिलियै कीते गेदे इस साल दे अध्ययन दे बाद किश खतरें बी उजागर कीते न, जियां कि अपराधी जांच ते KYC नियमें कोला बचने

लेई रकमै गी छोटे-छोटे हिस्सें च गेमिंग जां सट्टे पर लांदे न। केई ऑनलाइन कसीनो बी बिजन कोई बड्डा सट्टा लाए दे, इनें माध्यमें राहें काले धनै गी सखल्लें बैकिंग सिस्टम च लेई आंदे न। FATF नै चेचे तौरा पर चेतावनी दिती ऐ कि गेमिंग प्लेटफार्मे राहें इन-गेम खरीददारी ते FATF लाइव स्ट्रीमिंग डोनेशन, जनेह तरीके दा गलत इस्तमाल करदे होई आतंकवदी गतिविधियें लेई रपेया-पैहा उपलब्ध करांदे न।

<><><><><><>

IMD-Weather

मौसम विभाग ने अज्ज ओडिशा च मौलेधार बरखा बरने दी रेड-अलर्ट आहली चेतावनी जारी कीती ऐ। अगले द'उं दिनें दरान असम, मेघालय, नागालैंड, मणिपुर, मिजोरम, त्रिपुरा, पच्छिम बंगाल दे गंगा कन्नै लगदे इलाकें, बिहार, झारखंड, छत्तीसगढ़, केरलम, [माहे ते उत्तराखंड च बी भारी बरखा बरने दी शेंका ऐ। मौसम विभाग ने तमिलनाडु, पुदुचेरी, कराइक्काल, आंध्र प्रदेश, तेलंगाना, उप-हिमालयी पच्छिम बंगाल ते सिक्किम च इस महीने दी 15 तरीक धोड़ी शमानी बिजली मिलकने ते तेज ब्हां चलने दे इकमान बी दस्से न। अंडमान ते निकोबार टापुएं सने अरुणाचल प्रदेश, पूर्वी उत्तर प्रदेश ते मध्य प्रदेश च कल्लै धोड़ी इस्सै चाल्ली दे हालात बने दे रेई सकदे न। एहदे अलावा आंध्र प्रदेश दे समुंदरी कंड्डे आहले हिस्सें च अज्ज गर्म ते उमस भरोचा मौसम रौहने दे असार न।

<><><><><><>

US-Open

अमरीकी ओपन-2026 च अमरीका दे बेन शेल्टन ने पिच्छले चैम्पियन कार्तोस अल्कराज गी 5 सेट दे दिलचस्प मकाबले च रहाड़्यै बाहर करी दिता ऐ। 4 घंटे 25 मिंटे तगर चले दे इस मकाबले च बेन शेल्टन ने कार्लोस अल्कराज गी रहाया। हून सेमिफाइनल च बेन शेल्टन दा मकाबला फ्रांसिस टियाफो कन्नै होग। तौआई महिला वर्ग च एरिना सबालेंका ते जेसिका पेगुला ने बी सेमीफाइनल च अपनी थाहर पक्की करी लैती दी ऐ।

<><><><><><>